



## Sheria na Injili katika Upatanifu

**L**akini sisi sote, kwa uso usiotiwa utaji, tukiurudisha utukufu wa Bwana, kama vile katika kioo, tunabadilishwa tufanane na mfano uo huo, toka utukufu hata utukufu, kama vile kwa utukufu utokao kwa Bwana, aliye Roho.—2 **Wakorintho 3:18.**

Baada ya Yesu kufa msalabani kama dhabihu ya dhambi, sheria ya sherehe haikuweza kuwa na nguvu tena. Hata hivyo iliunganishwa na sheria ya maadili, na ilikuwa adhimu. Kwa ujumla ilikuwa na chapa ya uungu, na ilionesha utakatifu, haki na wema wa Mungu. Na ikiwa huduma ya mfumo wa kidini ambao ungeondolewa ulikuwa mwema, je, ni kwa jinsi gani ile halisi inapaswa kuwa bora zaidi, Kristo alipofunuliwa, akiwapa wote waaminio Roho Wake wa utakaso atiaye uzima?

Utangazaji wa sheria ya Amri Kumi ulikuwa onesho la pekee la utukufu na ukuu wa Mungu...

“Musa akawaambia watu, Msilogope, maana Mungu amekuja ili awajaribu, na utisho wake uwe mbele yenu, ili kwamba msifanye dhambi. Basi hao watu wakasimama mbali, naye Musa akalikaribia lile giza kuu Mungu alipokuwapo” (Kutoka 20:20, 21).

Msamaha wa dhambi, kuhesabiwa haki kwa imani katika Yesu Kristo, kumfikia Mungu kwa njia ya mpatanishi tu kwa sababu ya hali yao ya upotevu, hatia yao na dhambi—watu walikuwa na uelewa mdogo wa ukweli huu. Kwa kiasi kikubwa walikuwa wamepoteza maarifa yao juu ya Mungu na njia pekee ya kumkaribia. Walikuwa wamepoteza takribani uelewa wote wa kile kinachofanya dhambi na kile kinachofanya watu kuwa waadilifu. Msamaha wa dhambi kupitia kwa Yesu, Masihi aliyeahidiwa, ambaye dhabihu zao zilimwonesha kwa mfano, ulieleweka kidogo sana....

Sheria ya maadili haikuwa mfano au kivuli. Ilikuwepo kabla ya uumbaji wa mwanadamu, na itadumu kadiri kiti cha enzi cha Mungu kidumavyo. Mungu asingebadilisha wala kubatilisha kanuni moja ya sheria Yake ili kuwaokoa wanadamu; kwa maana sheria ni msingi wa serikali Yake. Haibadiliki, haibatilishwi, haina mwisho, na ni ya milele. Ili mwanadamu aokolewe, na ili heshima ya sheria idumishwe, ilikuwa ni lazima kwa Mwana wa Mungu kujitoa mwenyewe kuwa dhabihu kwa ajili ya dhambi. Yeye asiyejua dhambi alikuwa dhambi kwa ajili yetu. Alikufa kwa ajili yetu pale Kalvari. Kifo Chake kinaonesha upendo wa ajabu wa Mungu kwa mwanadamu, na kutobadilika kwa sheria Yake....

Kristo ndiye wakili wa mwenye dhambi. Wale wanaoipokea injili Yake wanamwona kwa uwazi kabisa. Wanaona uhusiano wa utume Wake kwa sheria, na wanakiri hekima na utukufu wa Mungu kama ulivyofunuliwa na Mwokozi. Utukufu wa Yesu unadhihirishwa katika sheria, ambayo ni nakala ya tabia Yake, na ufanisi Wake ubadilishao unaonekana juu ya nafsi mpaka wanadamu wanabadilishwa na kufanana Naye. Wanafanywa kuwa washiriki wa asili ya Mungu, na kukua zaidi na zaidi kama Mwokozi wao, wakiongezeka hatua kwa hatua kwa kupatana na mapenzi ya Mungu, mpaka kufikia ukamilifu. Sheria na injili vinapatana kikamilifu (Selected Messages 1:238-240).